

Nuzul Al Quran

07 April 2023 | 16 Ramadan 1444H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ

أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ

وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.

أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Subhanahu wa-Ta'ala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Subhanahu wa-Ta'ala di dunia dan akhirat.

Sidang Jumaat yang dirahmati Allah Subhanahu wa-Ta'ala

Ramadan adalah merupakan bulan yang mulia di sisi Allah Subhanahu wa Taala. Bulan ini terdapat tiga peristiwa besar iaitu bulan yang diwajibkan berpuasa, turunnya al-Quran al-Karim dan Malam Lailatul Qadar. Menurut Imam

al-Hakim, daripada Ibnu Abbas Radiallahu Anhu, al-Quran diturun pada malam lailatul qadar secara sekaligus daripada Lauhul Mahfudz ke langit dunia (Baitul Izzah). Firman Allah Subhanahu wa Taala dalam surah al Buruj ayat 21 hingga 22.

أَعُوذُ بِاللَّهِ مِنَ الشَّيْطَانِ الرَّجِيمِ
بَلْ هُوَ قُرْآنٌ مَّجِيدٌ ﴿٢١﴾ فِي لَوْحٍ مَّحْفُوظٍ ﴿٢٢﴾

Yang Bermaksud: *“Bahkan ia adalah al-Quran yang mulia. (Lagi terpelihara dengan sebaik-baiknya) di Lauhul Mahfuz.”*

Firman Allah Subhanahu wa Taala dalam surah al Al Baqarah ayat 185 :

شَهْرُ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَىٰ وَالْفُرْقَانِ

Yang bermaksud: *"Bulan Ramadan yang padanya diturunkan al-Quran menjadi petunjuk bagi sekalian manusia, dan menjadi keterangan yang menjelaskan petunjuk dan menjelaskan perbezaan antara yang benar dan yang batil."*

Setelah al-Quran diturunkan oleh Allah Subhanahu wa Taala dari Lauhul Mahfudz ke Baitul Izzah maka al-Quran diturunkan melalui malaikat Jibril secara beransur-ansur kepada Baginda Rasulullah Sallallahu ‘Alaihi Wasallam selama 23 tahun, 13 tahun di Mekah dan 10 tahun di Madinah. Ini bertujuan supaya manusia mudah memahami dan mengamalkan isi kandungan al Quran yang diturunkan.

Pada setiap 17 Ramadan setiap tahun kita menyambut dan memperingati peristiwa nuzul al-Quran. Tarikh ini adalah berdasarkan pendapat al-Waqidi menerusi Abu Ja'far al-Baqir yang mengatakan bahawa penurunan wahyu kepada Rasulullah Sallallahu 'Alaihi Wasallam bermula pada hari Isnin, 17 Ramadan sebagaimana yang diriwayatkan oleh Ibn Kathir dalam kitabnya al Bidayah Wa Nihayah.

Sidang Jumaat yang dirahmati Allah Subhanahu wa-Ta'ala

Al-Quran adalah merupakan kalamullah yang wajib dimuliakan dan diangkat sebagai kitab yang paling mulia dan dihormati oleh umat Islam dan seluruh manusia. Perbuatan mencela dan menghina al-Quran dengan membakar dan membuangnya, baru-baru ini adalah perbuatan keji dan terkutuk. Umat Islam hendaklah mempertahankan dan memartabatkan kemuliaan al Quran kerana al Quran adalah kitab yang diturunkan oleh Allah Subhanahu wa Taala kepada manusia dan Allah sentiasa meliharanya. Firman Allah Subhanahu wa Taala dalam surah al Hijr ayat 9:

إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ ﴿٩﴾

Yang bermaksud: *“Sesungguhnya Kami-lah yang menurunkan Al-Quran, dan Kami-lah yang memelihara dan menjaganya.”*

Memulia dan mengagungkan al-Quran adalah dengan cara belajar, membaca, beramal serta bertadabur dengan isi kandungannya lebih-lebih lagi pada bulan Ramadan ini. Sabda Rasulullah Sallallahu 'Alaihi Wasallam dalam hadis yang diriwayatkan oleh Imam Bukhari:

خَيْرُكُمْ مَنْ تَعَلَّمَ الْقُرْآنَ وَعَلَّمَهُ

Yang bermaksud: *“Sebaik-baik kamu adalah orang mempelajari al-Quran dan mengajarkannya”.*

Pada bulan Ramadan ini kita digalakkan bertadarus kerana ia adalah amalan Rasulullah Sallallahu ‘Alaihi Wasallam iaitu bertadarus dengan Jibril Alaihi Salam. Sabda Rasulullah Sallallahu ‘Alaihi Wasallam yang diriwayatkan oleh Imam Bukhari yang bermaksud:

“Rasulullah Sallallahu ‘Alaihi Wasallam adalah manusia yang paling pemurah (banyak bersedekah) terutama di bulan Ramadan ketika malaikat Jibril Alaihi Salam menemuinya. Jibril Alaihi Salam datang kepada Baginda Sallallahu ‘Alaihi Wasallam setiap malam pada bulan Ramadan, iaitu bertadarus al-Quran.”

Marilah kita mempelajari dan membaca al Quran dengan cara tartil (perlahan-lahan dan bertajwid), jangan kita bergopoh-gapah semasa membaca al-Quran semata-mata ingin mengkhataamnya dalam bulan Ramadan. Belajar dan bacalah al-Quran kerana mencari keredaan dan rahmat Allah Subhanahu wa Taala walaupun kita membacanya dalam keadaan tidak lancar. Sabda Rasulullah Sallallahu ‘Alaihi Wasallam dalam hadis yang diriwayatkan oleh Imam Muslim yang bermaksud:

“Orang yang mahir dengan bacaan al-Quran, maka ia beserta para malaikat yang mulia lagi sangat taat. Sedang orang yang membaca al-Quran dan ia berasa susah dalam bacaannya (tidak lancar) tetapi ia selalu berusaha, maka untuknya dua pahala.”

Sidang Jumaat yang dirahmati Allah Subhanahu wa-Ta'ala

Di bulan Ramadan yang mulia ini, janganlah kita menghabiskan masa kita dengan aktiviti yang tidak mendatangkan faedah seperti terlalu leka melayan Whatsapp, Tiktok, Facebook dan lain-lain. Marilah kita mengajak seluruh ahli keluarga kita membaca al-Quran pada bulan Ramadan ini dan bersama-sama melipat gandakan amalan untuk menghidupkan sepuluh malam terakhir di masjid. Semoga kita akan beroleh keredaan dan ketakwaan kepada Allah Subhanahu wa Taala di dunia dan akhirat.

أَعُوذُ بِاللَّهِ مِنَ الشَّيْطَانِ الرَّجِيمِ

إِنَّ هَذَا الْقُرْآنَ يَهْدِي لِلَّتِي هِيَ أَقْوَمُ وَيُبَشِّرُ الْمُؤْمِنِينَ الَّذِينَ يَعْمَلُونَ
الصَّالِحَاتِ أَنَّ لَهُمْ أَجْرًا كَبِيرًا ﴿٩﴾

Yang bermaksud: “*Sesungguhnya al Quran ini memberikan hidayah petunjuk kepada (jalan) yang lebih benar (agama Islam) dan memberikan khabar gembira kepada orang yang beriman yang melakukan amalan soleh bahawa bagi mereka ada pahala yang besar.*”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ

لِي وَلَكُمْ، وَلِسَائِرِ الْعَالَمِ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ

الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ

الْغَفُورُ الرَّحِيمُ.